



Fedje kommune
Adm.bygg
5947 FEDJE

Saksbehandlar, innvalstelefon
Solveig Kalvø Roald, 5557 2327

Invitasjon til digitalt møte om supplerande vern i Vestland

Statsforvaltaren har fått i oppdrag¹ frå Miljødirektoratet å gå i dialog med kommunane for å finne fram til kandidat område for vern for bevaring av verdifull natur. I den samanheng inviterer vi dei aktuelle kommunane i Vestland til eit felles digitalt møte der vi orienterer om oppdraget vi har fått.

I Vestland omfattar oppdraget i hovudtrekk mogleg oppretting av tre nye nasjonalparkar og inntil 22 mindre område i tillegg til utviding av 8 eksisterande verneområde.

Kandidatområde i Fedje

Kandidatområdet omfattar areal sør og vest for dagens Fedjemyrane landskapsvernområde, sjå vedlagte kart. Ei slik avgrensing vil også omkranse Sekkedalstjørna naturreservat. Utvidingsområdet har store førekomstar av terrengdekkande myr, både i mosaikk og overlapp med kystlynghei. Myrane i området har blitt danna på ulike måtar, og det er òg fleire døme på myr som har blitt danna ved attgroing av små tjørn. Her kan det vere fleire meter tjukk torv. Kor mykje av myra som er av dei ulike typane er ikkje nærmare vurdert. Det har vore omfattande torvuttak i området, men det er framleis mykje areal utan slike inngrep. I areala vest for Fedjemyrane landskapsvernområde har vegetasjonen alle moglege overgangstypar mellom lynghei og terrengdekkande myr. I sørvest ligg Vassviktjørna, her dekker takrøyr heile bukta i sør, og det er ein mindre førekomst i nordenden. Lyngheidifta i Fedje landskapsvernområde er tatt opp att etter dialog med Statsforvaltaren og vi ønskjer å legge til rette for slik drift i aktuelle areal i dette utvidingsområdet.

På grunn av desse kvalitetane vart området meldt inn som forslag til kandidat område for vern til Miljødirektoratet i 2019², då vi skulle identifisere område med viktig naturmangfald som kunne egna seg som verneområde³.

Naturkrise også i Vestland

¹ [Oppdragsbrev supplerande vern, 4.1.2022](#)

² [Svarbrev til miljødirektoratet med vedlegg, 1.2.2019](#)

³ [Oppdrag frå Miljødirektoratet om supplerande vern, 30.10.2018](#)



Globalt, så vel som lokalt i Vestland, står vi over for ei naturkrise like alvorleg som klimakrisa. Tap av natur til utbygging er den viktigaste enkeltårsaka. Områdevern sikrar at viktig natur ikkje blir øydelagt, og er difor eit av våre viktigaste verktøy i møte med naturkrisa.

Områda som no skal vurderast og utgreiast for vern i Vestland, skal bidra til å dekke manglane i eksisterande verneplanar. Ved å bevare desse områda som dei er, kan dei bidra til at vi når dei nasjonale måla om bevaring av eit representativt utval av norsk natur for kommande generasjonar og om å ta vare på trua artar og naturtypar. Områda som vert føreslått verna skal også bidra til å danne økologiske nettverk og gjere norsk natur og artar meir motstandsdyktige mot dei negative effektane frå klimaendringane.

Dialog om kandidatområda

Kommunane skal involverast i endeleg utveljing av kandidatområde for vern før det vert starta formelle verneprosessar. Det vil til dømes vere høve til å føreslå alternative område til dei som har kome fram i prosessen til no. Føresetnaden er at slike alternative kandidatområde har omtrent same naturfaglege kvalitetar som områda Miljødirektoratet har anbefalt å prioritere. Målet med dette er å finne fram til kandidatområde for vern av verdifull natur som det kan vere lokal oppslutning om. Då er også naturlegvis god dialog med grunneigarar og andre lokale interesser viktig. Gjennom denne dialogen med kommunane kan også Statsforvaltaren føreslå alternative område for å redusere eventuelle lokale konflikter. I vidare prosess skal formell oppstart av verneplanprosessar prioriterast i område der det er lokal aksept om dette.

Invitasjon til møte

For å informera om oppdraget, bakgrunnen for dette og for å starte dialogen om aktuelle område, inviterer vi til digitalt møte med politisk og administrativ leiing på Teams den 28. april frå kl 09.00-11.00. Vi sender eigen digital innkalling til teamsmøtet. I tillegg er det naturleg å invitere sakshandsamarar innanfor miljø og landbruk i kommunen.

Vi håpar å få førebelse synspunkt og innspel til kandidatområda, og ikkje minst om det er lokale interesser og brukarar av områda som vi bør gå i dialog med så tidleg som råd i arbeidet.

Etter dette møtet ser vi for oss eigne lokale møte og informasjonskveldar med grunneigarar og andre lokale interesser. Vi vil også ha møter/dialog med lag og interesseorganisasjonar på regionalt nivå.

Meir informasjon om oppdraget, kart og omtale av kandidatområda kan de finne på nettstaden vår på under temaet miljø og klima. Her vil ein også finne aktuelle dokument som vi refererer til i dette brevet.

Vel møtt!

Med helsing

Kjell Kvingedal
Miljødirektør

Eline Orheim
Seksjonsleiar

Dokumentet er elektronisk godkjent



Vedlegg Kart over kandidatområdet

